

PM: Puak-puak yang wujud mahu jatuhkan kerajaan kononnya sekular

Punca negara Islam lemah

UM 1 6 DEC 2001

KUALA LUMPUR 15 Dis. — Datuk Seri Dr. Mahathir Mohamad berkata, setiap negara Islam mempunyai puak yang ingin menjatuhkan kerajaan kerana kononnya kerajaan yang ada adalah sekular dan tidak Islam.

Menurut Perdana Menteri, puak-puak ini melancarkan serangan untuk menggulingkan kerajaan dan akibatnya, kerajaan yang mentadbir tidak dapat memberi tumpuan kepada pembangunan dan pertahanan negara.

Menjanjikan

Di Afghanistan, katanya, puak ini telah menjatuhkan kerajaan dan mereka kemudian merebut kuasa bagi diri sendiri.

Menurutnya, kepimpinan negara Islam seperti itu hanya berharap kepada semangat berjihad kononnya, tetapi pertahanan negara diserahkan kepada pasukan yang tidak berdisiplin, tidak terlatih dan tidak tersusun secara tentera.

“Ada kalanya budak belasan tahun yang tidak pun dapat memegang senjata, tidak tahu menggunakannya dihantar ke medan perang untuk berjihad dengan menjanjikan bahawa tempat di syurga dijamin, seolah-olah ada manusia yang boleh menjamin sesuatu di akhirat mengambil alih kuasa Tuhan.

■ Lihat muka 4

UM 1 6 DEC 2001 Punca negara Islam lemah

“Tapi apa yang berlaku ialah kerajaan dan puak yang begitu berani berjihad telah lari berseleler apabila diserang. Rupanya mereka sendiri tidak begitu ingin menjadi korban perang dan mati syahid,” katanya.

Perdana Menteri berkata demikian dalam perutusan Hari Raya Aidilfitri yang disiarkan melalui semua rangkaian radio dan televisyen tempatan dan ASTRO, malam ini.

Katanya, disebabkan kumpulan-kumpulan seperti ini yang kononnya berjuang untuk Islam dengan menjatuhkan kerajaan negara-negara Islam dan merebut kuasa pemerintahan, maka hari ini tidak ada satu pun negara Islam yang dapat dibangunkan dan mampu mempertahankan umat Islam dan negara-negara Islam.

“Apakah keburukan itu datang daripada Allah S.W.T? Sudah tentu tidak. Ia datang daripada orang Islam sendiri yang tidak mematuhi ajaran Islam yang sebenar, yang berpecah-belah, yang tidak berusaha untuk membangun dan menguatkan negara Islam,” katanya.

Dr. Mahathir berkata, masa sudah tiba bagi orang Islam

berhenti daripada menyalahkan Tuhan dan merenung serta menganalisis akan sebab-sebab umat Islam ditindas, negara Islam menjadi begitu lemah, mudah diserang dan ditewas serta tidak ada hari kebesaran Islam yang dapat dirayakan dengan sempurna dan gembira oleh ramai daripada orang Islam.

“Janganlah kita percaya orang yang mendakwa tempat kita orang Islam adalah di akhirat dan yang diperlukan daripada kita hanyalah berbuat ibadat tertentu yang memberi pahala kepada diri kita sendiri.

“Hari ini musuh kita berupaya memusnahkan orang Islam dengan menggugur beberapa bom nuklear sahaja. Jika semua orang Islam terbunuh, apakah akan ada manusia yang menganut ajaran Islam yang akan ditempatkan di akhirat kelak?” soalnya.

Dr. Mahathir berkata, di mana juga dilihat, didapati orang Islam bukan sahaja tidak dapat merayakan Aidilfitri dengan riang gembira tetapi sebaliknya mereka menderita sepanjang masa kerana ditindas, dibunuh, mati kesejukan, kelaparan dan tiada perubahan.

“Tetapi dapatkah kita salahkan musuh-musuh Islam semata-mata? Tidakkah ada kesalahan yang dilakukan oleh orang Islam sendiri, yang menyebabkan nasib buruk ini menimpa mereka? Apakah semua ini memang sudah ditakdirkan. Apakah ini kehendak Tuhan?” soalnya lagi.

Memetik Firman Allah *Surah An-Nisaa' Ayat 79 dan Al-Ra'du, Ayat 11*, Dr. Mahathir berkata, sebenarnya orang Islam sendiri yang menyebabkan mereka menjadi lemah dan mudah ditindas.

Katanya, kita tidak berusaha menguatkan diri dengan mengelak daripada perpecahan, mendirikan pemerintahan yang berwibawa dan cekap, menguasai segala ilmu yang penting untuk kemajuan dan ketahanan umat Islam.

“Tetapi kita tahu ramai orang Islam yang menolak persaudaraan dalam Islam, yang suka melempar fitnah dan cuba mencetuskan huru-hara dalam negara sendiri dengan menyalah tafsir dan memperalatkan agama Islam untuk kepentingan diri,” katanya.